



ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՎԱՅՈՑ ՁՈՐԻ ՄԱՐԶՊԵՏԻ

Ո Ր Ո Շ ՈՒ Մ

ք. Եղեգնաձոր, Շահումյան 5

N 15

„ 20 „ մարտի 2014թ


ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՎԱՅՈՑ ՁՈՐԻ ՄԱՐԶՊԵՏԻՆ ԿԻՑ ԵՐԻՏԱՍԱՐԴԱԿԱՆ ԽՈՐՀՐԴԻ ՄԱՍԻՆ


Ղեկավարվելով ՀՀ Նախագահի 1997թ. մայիսի 6-ի ՆՀ-728 հրամանագրի 1.6-րդ կետի պահանջով և հիմք ընդունելով ՀՀ կառավարության 2012 թվականի դեկտեմբերի 27-ի N 1693-Ն որոշմամբ հաստատված ՀՀ երիտասարդական պետական քաղաքականության 2013-2017 թվականների ռազմավարության և միջոցառումների ծրագրի 14-րդ կետի, ինչպես նաև Հայաստանի Հանրապետության վարչապետի 2014թվականի փետրվարի 10-ի թիվ 85-Ա որոշման պահանջները, Հայաստանի Հանրապետության Վայոց ձորի մարզի տարածքային կառավարման և տեղական ինքնակառավարման մարմիններում երիտասարդական քաղաքականության արդյունավետության բարձրացման, երիտասարդական մասնակցության խթանման նպատակով՝

Ո Ր Ո Շ ՈՒ Մ ԵՄ՝

1. Հաստատել Հայաստանի Հանրապետության Վայոց ձորի մարզպետին առընթեր երիտասարդական խորհրդի կանոնադրությունը /հավելված 1/:
2. Ստեղծել Հայաստանի Հանրապետության Վայոց ձորի մարզպետին առընթեր երիտասարդական խորհուրդ:
3. Հաստատել Հայաստանի Հանրապետության Վայոց ձորի մարզպետին առընթեր երիտասարդական խորհրդի անհատական կազմը /հավելված 2/:



 **Է. ՂԱԶԱՐՅԱՆ**



Կ Ա Ն Ո Ն Ա Դ Ր ՈՒ Թ Յ ՈՒ Ն

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՎԱՅՈՑ ՁՈՐԻ ՄԱՐԶՊԵՏԻՆ ԿԻՑ ԵՐԻՏԱՍԱՐԴԱԿԱՆ ԽՈՐՀՐԴԻ

1. ԸՆԴՀԱՆՈՒՐ ԴՐՈՒՅԹՆԵՐ

1. Հայաստանի Հանրապետության Վայոց ձորի մարզպետին կից երիտասարդական խորհուրդը (այսուհետ՝ խորհուրդ) խորհրդակցական մարմին է:

2. Խորհրդի գործունեությունն իրականացվում է Հայաստանի Հանրապետության օրենսդրությանը և խորհրդի կանոնադրությանը համապատասխան:

3. Խորհրդի ձևավորման ու գործունեության սկզբունքներն են՝

1) ժողովրդավարությունը, թափանցիկությունը և հրապարակայնությունը.

2) երիտասարդների շրջանում բազմակարծության և հավասար հնարավորությունների ապահովումը՝ անկախ քաղաքական կամ այլ հայացքներից, ազգային կամ կրոնական պատկանելությունից, սեռից, տարիքից կամ սոցիալական բնույթի այլ հանգամանքներից.

3) երիտասարդական և ուսանողական կազմակերպությունների ներկայացուցիչների, երիտասարդական քաղաքականության և երիտասարդական աշխատանքի ոլորտի փորձագետների և հետազոտողների մասնակցությունը տեղերում որոշումների ընդունման գործընթացներին.

4) տարածքային կառավարման, տեղական ինքնակառավարման մարմինների և ոչ պետական կազմակերպությունների համագործակցությունը և երիտասարդական քաղաքականության բնագավառում համակառավարման ապահովումը.

5) խորհրդի կազմի ձևավորման գործընթացում ներկայացուցչականության, արհեստավարժության և մասնագիտական գիտելիքների առաջնայնության ապահովումը:

II. ԽՈՐՀՐԴԻ ՆՊԱՏԱԿԸ, ԽՆԴԻՐՆԵՐՆ ՈՒ ԳՈՐԾԱՌՈՒՅԹՆԵՐԸ

4. Խորհրդի նպատակը Հայաստանի Հանրապետության Վայոց ձորի մարզի համայնքներում երիտասարդական քաղաքականության մշակմանն ու իրականացմանն աջակցելը և խթանելը, երիտասարդական քաղաքականության համակարգված, հասցեավորված ու նպատակային իրականացմանն աջակցելը, հանրային կյանքի տարբեր բնագավառներում երիտասարդների մասնակցությունը խթանելն ու երիտասարդական կազմակերպությունների գործունեությանը նպաստելն է:

5. Խորհրդի խնդիրներն ու գործառույթներն են՝

1) մարզում երիտասարդական քաղաքականության արդյունավետության բարձրացումը, երիտասարդության հարցերին առնչվող մարզային և համայնքային մարմինների համագործակցության ապահովումը.

2) մարզերում երիտասարդական քաղաքականության գնահատումն ու Հայաստանի Հանրապետության Վայոց ձորի մարզպետին (այսուհետ՝ մարզպետ) համապատասխան առաջարկություններ ներկայացնելը.

3) երիտասարդությանն առնչվող հարցերի բնագավառում մարզային և համայնքային ծրագրերի քննարկումը, դրանց ֆինանսավորման անհրաժեշտության, ծավալների ու ձևերի վերաբերյալ առաջարկությունների մշակումը և դրանք ներկայացնելը, հանրային կյանքի տարբեր բնագավառներում երիտասարդների մասնակցության համար բարենպաստ մթնոլորտի ձևավորումը, երիտասարդական կազմակերպությունների գործունեության ընդլայնման և խրախուսման նպատակով տարբեր կազմակերպական, ծրագրային, ենթակառուցվածքային և այլ խնդիրների հայտնաբերումը և մարզպետին համապատասխան առաջարկություններ ներկայացնելը.

4) երիտասարդներին առնչվող կրթական, սոցիալական, առողջապահական, բնապահպանական, իրավական և այլ խնդիրների քննարկումը և մարզպետին առաջարկություններ ներկայացնելը.

5) երիտասարդության (այդ թվում՝ ազգային փոքրամասնությունների) հոգևոր և ֆիզիկական զարգացմանը, քաղաքացիական և ազգային գիտակցության բարձրացմանը, հայրենասիրական դաստիարակությանը, ազգային հոգևոր-մշակութային ժառանգությանն ու համամարդկային արժեքներին հաղորդակից դարձնելուն, ավանդական բարոյական արժեքների քարոզչությանն ուղղված հասարակական նախաձեռնություններին և ծրագրերին, շնորհալի անհատ ստեղծագործողներին և արվեստագետներին աջակցելու մեխանիզմների ապահովմանը նպաստելը.

6) մարզում կատարվող երիտասարդական աշխատանքները գնահատելու և խթանելու նպատակով մրցանակաբաշխություն կազմակերպելն ու անցկացնելը, տարվա

ընթացքում երիտասարդական քաղաքականության և երիտասարդական աշխատանքի ոլորտում լուրջ ներդրում ունեցած երիտասարդներին կամ երիտասարդական կազմակերպություններին տարբեր կարգի պարգևների, մրցանակների և պատվոգրերի շնորհման ներկայացնելը մարզպետին:

III. ԽՈՐՀՐԴԻ ԿԱԶՄՆ ՈՒ ԱՇԽԱՏԱՆՔԻ ԿԱԶՄԱԿԵՐՊՈՒՄԸ

6. Խորհրդի կազմում ընդգրկվում են տվյալ մարզի բոլոր քաղաքային, ինչպես նաև 3500 և ավելի բնակիչ ունեցող համայնքների երկուական ներկայացուցիչ, որոնցից մեկը ներկայացնում է պետական, իսկ մյուսը՝ ոչ պետական հատվածը:

7. Խորհրդի պետական հատվածը ներկայացնող անդամը համայնքի ղեկավարի տեղակալն է, իսկ այդ հաստիքի բացակայության դեպքում՝ համապատասխան համայնքի աշխատակազմի ղեկավարը:

8. Խորհրդի ոչ պետական հատվածը ներկայացնող անդամը 16-30 տարեկան երիտասարդ է, որը համապատասխանում է հետևյալ չափանիշներին՝

1) երիտասարդներին առնչվող կրթական, սոցիալական, զբաղվածության, առողջապահական և մշակութային խնդիրներին տիրապետելը.

2) երիտասարդական կազմակերպություններում տարբեր ծրագրերին կամ միջոցառումներին մասնակցության փորձ.

3) երիտասարդական քաղաքականության բնագավառում միջազգային փորձի, պետական և հանրային կառավարման համակարգի, ծրագրերի մշակման, իրականացման և գնահատման առանձնահատկությունների իմացություն:

9. Հավասար պայմանների դեպքում որպես առավելություն են դիտվում երիտասարդական քաղաքականության բնագավառում իրականացված փորձագիտական աշխատանքները կամ հրապարակումները, ոչ ֆորմալ կրթության ոլորտի գիտելիքները և գործնական աշխատանքի փորձը:

10. Խորհրդի ոչ պետական հատվածը ներկայացնող անդամն առաջադրվում է համայնքի ավագանու կողմից՝ մրցութային կարգով, սույն կանոնադրության 8-րդ կետին համապատասխան չափանիշներով: Մարզպետարանի աշխատակազմի ղեկավարն ապահովում է մրցույթի վերաբերյալ հայտարարության զետեղումը մարզպետարանի պաշտոնական կայքէջում, իսկ համայնքի ավագանին համապատասխան հայտարարություն է տեղադրում համայնքի տպագիր և էլեկտրոնային զանգվածային լրատվության միջոցներում, ինչպես նաև իր վարչական շենքում հայտարարությունների համար նախատեսված տեղում:

11. Նշված չափանիշները բավարարող թեկնածու չլինելու դեպքում խորհրդի ոչ պետական հատվածը ներկայացնող անդամը կարող է առաջադրվել համայնքի ավա-

զանու կազմից՝ ինքնաառաջադրման սկզբունքով, սույն կանոնադրության 8-րդ կետին համապատասխան չափանիշներով: Համապատասխան թեկնածու չլինելու դեպքում տվյալ համայնքից խորհրդի ոչ պետական հատվածը ներկայացնող անդամ է ընտրվում ավագանու՝ տարիքով ամենաերիտասարդ անդամը:

12. Խորհրդի անհատական կազմը հաստատում է մարզպետը՝ մարզպետարանի աշխատակազմի ղեկավարի ներկայացմամբ:

13. Խորհրդի նախագահը մարզպետն է: Խորհուրդն ունի քարտուղար, որն ընտրվում է խորհրդի ոչ պետական հատվածը ներկայացնող անդամներից:

14. Խորհրդի նիստերը գումարվում են խորհրդի նախագահի կողմից՝ ոչ ուշ, քան յուրաքանչյուր երեք ամիսը մեկ անգամ: Խորհրդի նիստ կարող է գումարվել նաև ըստ անհրաժեշտության՝ խորհրդի անդամների առնվազն 1/3-ի առաջարկությամբ:

15. Խորհրդի նիստերը նախագահում է խորհրդի նախագահը: Խորհրդի նիստերի արձանագրությունները և որոշումներն ստորագրում են խորհրդի նախագահը և խորհրդի քարտուղարը: Խորհրդի գործունեությանն առնչվող փաստաթղթերն ու որոշումները հրապարակվում են մարզպետարանի կայքէջում: Խորհրդի գործունեությունը լուսաբանվում է զանգվածային լրատվության միջոցներով և համացանցով:

16. Խորհրդի նիստերն իրավազոր են, եթե դրանց մասնակցում է խորհրդի անդամների առնվազն 2/3-ը: Խորհրդի որոշումներն ընդունվում են բաց քվեարկությամբ՝ նիստին ներկա անդամների ձայների պարզ մեծամասնությամբ: Նիստին ներկա անդամների առնվազն 2/3-ի պահանջով կարող է անցկացվել փակ քվեարկություն:

17. Խորհրդի որոշումների հիման վրա, ըստ անհրաժեշտության, մարզպետի կողմից սահմանված կարգով կարող են ընդունվել համապատասխան որոշումներ կամ տրվել համապատասխան հանձնարարականներ:

18. Խորհրդի նիստերին ի պաշտոնե մասնակցում է մարզպետարանի աշխատակազմի երիտասարդության հարցերը համակարգող համապատասխան աշխատողը՝ խորհրդակցական ձայնի իրավունքով: Խորհրդի նիստերին հասարակական հիմունքներով կարող են հրավիրվել ոլորտի պետական լիազոր մարմնի ներկայացուցիչներ, մարզային և համայնքային մարմինների, գիտական և բարձրագույն ուսումնական հաստատությունների, պետական և ոչ պետական կազմակերպությունների, զանգվածային լրատվության միջոցների ներկայացուցիչներ և այլ անձինք:

19. Խորհուրդն իր աշխատանքներն առավել արդյունավետ դարձնելու նպատակով կարող է ընդունել աշխատակարգ, հասարակական հիմունքներով ձևավորել աշխատանքային խմբեր և այդ խմբերում ընդգրկել խորհրդի անդամ չհանդիսացող անձանց:

Հավելված N 2
 ՀՀ Վայոց ձորի մարզպետ
 2014 թ.-ի մարտի 20-ի N 15
 որոշման

ՀՀ Վայոց ձորի մարզպետին առընթեր Երիտասարդական խորհրդի կազմ

Հ/Հ	Անուն, Ազգանուն	Ծննդյան տարեթիվ	Կրթություն	Աշխատանքի վայր	Հեռախոս
1.	Էդգար Ղազարյան	1975թ	բարձրագույն	ՀՀ Վայոց ձորի մարզպետ	093 42 39 18
2.	Վարդան Ավագյան	1974թ	բարձրագույն	Եղեգնաձորի փոխքաղաքապետ	094 59 48 11
3.	Գագիկ Մարգարյան	1985թ.	բարձրագույն	Ավագանու անդամ	094 900 154
4.	Վասիլ Ասլանյան	1976թ.	բարձրագույն	Վայքի փոխքաղաքապետ	094 33 37 65
5.	Արգիշտի Միքայելյան	1988թ.	բարձրագույն	"Թայմ տուր" ՍՊԸ տնօրեն	093 00 71 71
6.	Հովիկ Մնացականյան	1963թ.	բարձրագույն	Մալիշկայի գյուղապետարանի աշխատակազմի քարտուղար	094 48 31 30
7.	Անուշավան Մովսիսյան	1987թ.	բարձրագույն	Եղեգնաձորի քոլեջի ուսուցիչ	093 97 33 55
8.	Սամվել Մարգարյան	1952թ.	միջին մասնագիտական	Ջերմուկի փոխքաղաքապետ	093 04 83 67
9.	Սյուզաննա Ավետիսյան	1989թ.	բարձրագույն	Ջերմուկի երիտասարդական կենտրոնի տնօրեն	093 55 00 93

Աշխատակազմի ղեկավար



Վ. ՍԱԿԱԿՅԱՆ

Վ. ՍԱԿԱԿՅԱՆ